

Morning Dogri (NSD) National News Bulletin 17-02-2025

आकाशवाणी

- प्रधानमंत्री नरेन्द्र मोदी होरें आखेआ ऐ जे दुनिया अज्ज पर्यावरण ते सशक्तिकरण लेई फैशन आला रौंह अपना करदा ऐ ते भारत इस भेठा इक अगुवाह दी भूमका नभाई सकदा ऐ।
- नमीं दिल्ली ते उत्तर भारत दे केई हिस्सें च अज्ज बडलै 4.0 तीव्रता दा भूंचाल आया ऐ।
- कतर दे अमीर शेख महामहिम शेख तमीम बिन हमद अल थानी अज्जै थमां भारत दी दऊं दिनें दी सरकारी यात्रा पर आवा करदे न।
- इजराइल दे प्रधानमंत्री बेन्जामिन नेतिनयाहू होरें आखेआ ऐ जे ओह गाजा पट्टी दे इलाके थमां लोकें गी हटाइयै उनेंगी कुतै होर बसाने बारे योजना पर अमरीकी राष्ट्रपति डोनाल्ड ट्रंप हुंदे कन्नै मिलियै कम्म करा करदे न।
- प्लेसिज ऑफ वर्कशिप एक्ट यानि पूजा आली थाहरें सरबंधत दाखल 7 अर्जिउं पर अज्ज सुप्रीम कोर्ट च सुनवाई होग।
- महिला प्रीमियर लीग 2025 क्रिकेट च गुजरात जायंटस नै जंदी रातीं यूपी वारियर गी 6 विकेटें कन्नै हराया।

<><><><><><>

PM Bharat Tex 2025 Revised

प्रधानमंत्री नरेन्द्र मोदी होरें आखेआ ऐ जे अज्ज दुनिया पर्यावरण ते सशक्तिकरण लेई फैशन दे नजरिये गी अपनाऽ करदी ऐ ते भारत इस सरबंधै च दुनिया दी अगुवाई करी सकदा ऐ। उ'नें आखेआ जे टिकाउपन, भारती कपड़े ते भारती परंपराएं दा हिस्सा रेहा ऐ ते भारत च कुदरत दे अनुकूल कपड़ा तैयार करना, कुदरती रंगें दा इस्तेमाल, भारती कपड़ा निर्माण परंपराएं दा हिस्सा रेहा ऐ।

नमीं दिल्ली दे भारत मंडपम च आयोजित भारत-टेक्स 2025 गी संबोधित करदे होई प्रधानमंत्री होरें आखेआ जे भारत नै अपनिएं परंपराएं गी नमिएं तकनीकें कन्नै जोड़ियै नां छड़ा इस खेत्तर च अपना दबदबा कायम रखे दा ऐ ते कन्नै अपने बुनकरें, कपड़ा निर्माण कन्नै जुड़े दे कारीगिरें, महिलाएं ते युवाएं लेई नमैं-नमैं मौके पैदा करा'रदा ऐ।

<><><><><><>

PM-India Textile 2025

प्रधानमंत्री होरें आखेआ जे सरकार दा मकसद 2030 तोहड़ी कपड़ें दे निर्यात गी 3 लक्ख करोड़ रुपें थमां बधाइयै 9 लक्ख करोड़ रुपें तगर बधाना ऐ। उ'नें आखेआ जे भारत ऐल्लै भारत कपड़ें दे निर्यात करने आह्ला दुनिया दा 6मां सब्बनें शा बड़डा मुख्य ऐ। उनें आखेआ जे भारत कार्बन फाइबर बनाने दी दिशा च अगगें बधै करदा ऐ। प्रधानमंत्री होरें इब्बी आखेआ ऐ जे सरकार कपड़ा खेत्तर लेई कुशल प्रतिभा पूल बनाने उप्पर कम्म करा'रदी ऐ।

<><><><><><>

Delhi Earthquake

नमीं दिल्ली ते उत्तर भारत दे केई हिस्सें च अज्ज बडलै 4.0 तीव्रता दा भूंचाल आया ऐ। जानकारी मूजब एह भूंचाल बडलै 5 बज्जियै 36एं मिंटे पर आया ते एहदा केन्द्र दिल्ली कश लिमीं कोला 5 किलोमीटर हेठ दस्सेआ जा'रदा ऐ। भूंचाल ते जिमीं हेठ दिएं गतिविधिएं पर तक्क रखने आले मैहकमे मूजब दिल्ली, नोएडा, इंदिरापुरम ते एनसीआर ते होरने क्षेत्रें च आए दे भूंचाल दा केन्द्र 38.59 उत्तरी अक्षांश ते 77.16 पूर्वी देशांत पर हा। खीरी खबरां थोने तगर इस भूंचाल कारण कुसै चाल्ली दे जानी जां माली नुक्सान दी फिलहाल कोई जानकारी नेई ऐ।

<><><><><><>

Delhi Helpline

दिल्ली-एनसीआर दे इलाकें च अज्ज बडलै आए दे भूंचाल दे बाद दिल्ली पुलसै इक हैल्पलाइन नंबर बी जारी कीता ऐ जेह्दे पर कुसै बी इमरजेंसी आली स्थिति च संपर्क कीता जाई सकदा ऐ।

इक सोशल मीडिया पोस्ट च दिल्ली पुलसै लोकें गी लोड़ पौने पर 112 नंबर पर संपर्क करने लेई आखेआ ऐ। तोआई बिहार दे सीवान च बी अज्ज बडलै 8 बज्जियै दऊं मिटे पर भूंचाल दे झटके मसूस कीते गे न।

<><><><><><>

Qatar Amir Visit

कतर दे अमीर शेख महामहिम शेख तमीम बिन हमद अल थानी अज्जै थमां भारत दी दऊं दिनें दी सरकारी यात्रा पर आवा करदे न। इस दरान ओह प्रधानमंत्री नरेन्द्र मोदी हुंदे कन्नै गल्लबात बी करगंन। उंदे कन्नै इक उच्ची सतह दा शिष्टमंडल बी आवै करदा ऐ जेहदे च मंत्री, बड्डे अफसर ते बपारिएं दा इक प्रतिनिधिमंडल बी शामिल ऐ। विदेश मंत्रालय नै इक ब्यान च जानकारी दित्ती ऐ जे कतर दे अमीर हुंदी एह यात्रा दौनें मुख्यें बशकार बधदी दोहरी सांझ भ्याली गी होर मती रफतार ते मजबूती देग। भारत ते कतर बशकार दोस्ती, विश्वास ते इक दुए दा सम्मान करने दे गैहरे ते एतिहासक सरबंध न। विदेश मंत्रालय नै दस्सेआ ऐ जे हाल च दौनें मुख्यें बशकार बपार, रास पूंजी लाने, ऊर्जा, प्रौद्योगिकी, संस्कृति ते लोकें बशकार आपसी सरबंधें दे क्षेत्रें च बड़ा मता बाद्धा होआ ऐ। एहदे शा पैहले कतर दे अमीर शेख तमीम बिन हमद होर 2015 च भारत आए हे।

<><><><><><>

Railway

नमीं दिल्ली रेलवे स्टेशन पर अत्तरू रातीं मची दी नस्सपज्ज आली घटना दे बाद उत्तर रेलवे नै स्टेशन पर कुसै बी माड़ी घटना थमां बचाह लेइ लोड़चदे उपाह कीते न। रेलवे दा आक्खना ऐ जे प्रयागराज जाने आलियां सब्बै विशेष रेलगडिडयां प्लैटफार्म नंबर 16 परा खाना होग ते यात्रिएं दा ओने जानाअजमेरी गेट दी तरफा होग। एहदे इलावा रेलवे सुरक्षा बल ते सरकारी रेलवे पुलिस बल दी तैनाती बी बधाई दित्ती गेदी ऐ।

<><><><><><>

Netanyahu-Gaza

इजराइल दे प्रधानमंत्री बेन्जामिन नेतनयाहू होरें आखेआ ऐ जे ओह गाजा पट्टी दे इलाके थमां लोकें गी हटाइयै उनेंगी कुदरै होर बसाने बारे, योजना पर अमरीकी राष्ट्रपति डोनाल्ड ट्रंप हुंदे कन्नै मिलियै कम्म करा करदे न। उनें आखेआ जे इस क्षेत्र गी सुरक्षत रखने दे बस इयै इक तरीका ऐ। जियां जे पैहले बी खबर दित्ती जाई चुकी दी ऐ जे अमरीका दे विदेश मंत्री मार्को रुबियो कल्लै थमां महत्वपूर्ण क्षेत्र दे दौरे पर न ते कल उनें नितेनाहू हुंदे नै इस योजना बारे बचार बंटादरा कीता हा। इजराइल दी लड़ाई दे कारण दी हिमायत करदे होई उनें आखेआ हा जे इलाके दी शांति ते रमानदारी लेई हमास दा खात्मा बड़ा जरूरी ऐ। अजें कि नितेनयाहू होरें आखेआ ऐ जे लोकें गी दूई थाहर उंदी मर्जी मताबक गै कीता जाग, पर आलोचकें दा आखना ऐ जे गाजा च जिस चाल्ली दी तबाही होई दी ऐ, उत्थें लोकें कश होर कोई चारा गै नेई ऐ।

<><><><><><>

Place Of Workship

प्लेसिज ऑफ वर्कशिप एक्ट यानि पूजा आली थाहरें सरबंधी दाखल 7 अर्जिएं पर अज्ज सुप्रीम कोर्ट च सुनवाई होनी ऐ। दरअसल इस ब'रे 2 जनवरी गी सुप्रीम कोर्ट एआईएमआईएम दे प्रमुख असदुद्दीन ओवैसी हुंदी याचिका पर राजी होआ हा। उंदी अर्जी गी पैहले थमां बकाया पेंदिएं 6 याचिकाएं कन्नै जोड़ेआ गेआ हा ते इनें 7एं याचिकाएं पर सुनवाई करने लेई अज्ज 17 फरवरी दी तरीक पाई ही। ध्यानजोग ऐ जे ओवैसी होरें अपनी याचिका च 1991 आले पूजा स्थन कनून गी लागू करने दी मंग कीती दी ऐ। इस कनून दे मताबक 15 अगस्त 1947 थमां पैहले बने दे कुसै बी धार्मिक थाहर जेहदे च मंदर, मसीत, गुरुद्वारा जां कोई होर कोई बी इबादतगाह होई सकदी ऐ, गी कुसै दुए धर्म दी इबादतगाह च नेई बदलेआ जाई सकदा।

<><><><><><>

Women Cricket League

क्रिकेट च महिलाएं दे प्रीमीयर लीग दे इक रोमांचक मकाबले च गुजरात जायंटस नै जंदी रातीं बड़ोदरा दे कोटांबी स्टेडियम च प्रतियोगिता दे दुए मैच च यूपी वारियर्स गी 6 विकटें कन्नै हराया।

144 रंजें दा पिच्छा करदे होई गुजरात जायंटस नै 18 ओवरें च जित्त हासल कीती। कप्तान अशलेग गार्डनर होरें 52 रंज बनाए ते उनेंगी गी मैच दा बेह्तरीन खडारण घोषत कीता।

<><><><><><>

Mahakumbh

प्रयागराज च आयोजित महाकुंभ च 40 ज्हार मरब्बा फुट दे इलाके च फेले दा स्वच्छ सुजल ग्रां बक्ख-बक्ख सरकारी पैहलकदमिएं दे तैह्त उत्तर प्रदेश दे ग्रामीण क्षेत्रें च आए दे सकारात्मक बदलाव दा प्रदर्शन करा करदा ऐ। इत्थें ओने आले सैलानिएं गी इस ग्रां च राज्य दी सफलताएं ते उपलब्धिएं दी झलक दिखने गी लब्भै करदी ऐ। इस ग्रां च सरकार दे एतिहासक सुधारें कन्नै ग्राएं च आवा करदे बदलाव दा नजारा साफ दिखने गी लब्भै करदा ऐ। इस आदर्श ग्रां च दस्सेआ गेदा ऐ जे किस चाल्ली बुंदेलखंड दे इलाके च पानी दी समस्या गी दूर करी दित्ता गेआ ऐ जेह्दे च बांडा, झांसी, चित्रकूट, ललितपुर ते माहोबा बी शामिल न। इस ग्रां गी जिस विषय सार तैह्त तैआर कीता गेदा ऐ ओ ऐ-“पेयजल का समाधान-मेरे गांव की नयी पहचान”। इन्ना गै नेइं इस ग्रां च भारत दे “अतिथि देवो भव” आले मूल संस्कार गी बी दर्शाया गेझा ऐ, ग्रां च हर संजा गंगा आरती कीती जंदी ऐ ते उत्थें औने जाने आले लोकें गी जल परशाद बी दित्ता जंदा ऐ। नमामी गंगे ते ग्रामीण जल आपूर्ति मैह्कमे आस्सेआ तैआर कीता गेदा एह् ग्रां इस म्हीने दी 26 तरीक तोड़ी लोकें दे दिखने लेई खुल्ले दा रौहग।

<><><><><><>